

SARS e kgathatsehile ha Setsebi se seng hape sa Lekgetho se ahlolwa ka lebaka la ho se ikobele tefo ya VAT

Tshwane, 21 Motsheanong 2021 – Setsebi sa Lekgetho, seo pejana se ileng sa leka ho qoba ho hlahella pela lekgotla empa sa tshwarwa hamoraonyana, se ahlotswe ho hlola dikgwedi tse felletseng tse 24 mane Lekgotleng la Lebatowa la Bloemfontein bakeng sa ditlolo tsa molao tse 48 tsa VAT. Sena se latela ho tshwarwa ha Mong. Luvhengo ka la 9 Loetse 2020, ka mora ho hloleha ho hlahella lekgetlo la pele ka la 31 Phupu 2020. O ile a tshwarwa mme a lokollwa ka beile.

Ditlolo tsena tsa ho se ikobele tefo ya lekgetho di etsahatse ka nako eo Setsebi sa Lekgetho Ritondeni Luvhengo a neng a jere boikarabelo ba merero ya lekgetho ya khampani ya kaho.

Luvhengo o ne a tobane le diqoso tse 24 tsa ho hloleha ho talola dintlha tse amehang tse mabapi le dikgutliso tsa VAT 201 tseo a ileng a fana ka tsona ho SARS.

O ile a fana ka dikgutliso tsa VAT 201 tse 24 tsa *nil* ho SARS ntle le tumello ya tlelaente ka sepheo sa ho fumana Setifikeiti sa Tlhekelo ya Lekgetho.

Ka lebaka la seo, moqusuwa le yena o ile a qoswa ka diqoso tse 24 ka lebaka la ho etsa dintho ntle le tumello ya tlelaente ya hae.

Khomeshenara ya SARS Edward Kieswetter o itse, “SARS e keke ya mamella ho se ikobele tefo ya lekgetho ho etswang ke balefalekgetho kapa ditsebi tsa lekgetho. Re bile re nkela ditsebi tsa lekgetho hodimo haholo ka ha ke bakenadipakeng ba bohlokwa tseleng ya rona ya ho fihlella tefo ya lekgetho ka boithaopi.”

“Ho se ikobele tefo ya lekgetho ho nonyetsa bokgoni ba SARS ba ho bokella lekgetho ebile ho fokodisa tlwaelo ya boikobelo ba tefo ya lekgetho. Phokotseho ya pokello ya lekgetho e bolela hore ditshebeletso tsa motheo tse tobileng bafumanehi le ba kotsing ya ho utlwiswa bohloko ha di kgone ho ka phethahatswa, mme sena se etsahala ka nako e mahlonoko moo sewa sena sa Covid-19 se ntseng se baka motswebere ikonoming ya rona.”

“SARS e ntse e tswela pele ho nolofaletsa balefalekgetho le ditsebi tsa lekgetho boikobelo ba tefo ya lekgetho mme e tla tswela pele ho thatafalletsa le ho etsa hore ditjeo e be tse hodimo bakeng sa bao ba sa batleng ho ikobela sena ka boomo,” ho rialo Mong. Kieswetter.

O tlatsitse ka hore ditsebi tsa lekgetho ba tshepilwe ke balefalekgetho nakong eo ba ba emelang mme tshepo ena ha ya lokela ho hatikelwa ka maoto. Le ha bongata ba ditsebi tsa lekgetho bo ntse bo tswela pele ho itshwara ka tsela e hlomphehang le ho etsa tsohle tse ditabatabelong tsa tsa ditlelaente tsa bona, ho na le ba bang ba shebaneng le ditabatabelo tsa bona feela.

Khomeshenara o eleditse balefalekgetho hore ba dule ba fadimehile le hore ba hlokomele hore ba kgetha mang ho ba emela jwalo ka ditsebi tsa lekgetho le ho lekola maemo a bona a boingodiso websaeteng ya SARS e leng www.sars.gov.za

Ho fumana tse ngata, ikopanye le SarsMedia@sars.gov.za